

Кондак 1

Аз есмь пастырь добрый, рекий о Себе Господь глагола к тебе, первопрестольный апостоле Петре: аще любиши Мя, паси овцы Моя; и Он же рекши: Аз есмь Иисус. Глагола от Тебе верховный апостоле Павле: яко сосуд избран Ми есть сей, пронести имя Мое пред языки. Купно же к всем обещаю вам апостолом своим рече: яко же посла Мя Отец, и Аз посылаю вы: шедше научите вся языки. Вы же толику благодать от добраго Пастыреначальника своего имуще, яко первые по Нем всея вселенная пастырие и учителяе, от всяких нас бед, на пажить спасенне сохраняйте, да зовем вам:

Радуйтесь, святити первопрестольницы Петре и Павле, со всеми апостолами святыми.

Икос 1

Блажен еси Симоне, сыне Ионин, рече ти Христос, Сын Бога Живаго, достославне апостоле Петре. Мы же, како ты достойно возможем у блаженнаго Богом блажити! Но точию любовным долгом верно влекомы, сице вопием к тебе:

Радуйся, первейшее по Христе между апостолами Церкви Святыя основание.

Радуйся, крепкий веры православных столпе и утверждение.

Радуйся, теплый любителю Христова учения.

Радуйся, первоседальнике апостольскаго учения.

Радуйся, добрый Царствия Небеснаго вратарю.

Радуйся, известный кающимся о гресех врачу.

Радуйся, мирскую суету отвергший, духовную жизнь возлюбивый.

Радуйся, тленные сети оставльший, нетленными вселенную уловивый.

Радуйтесь, с Петром и Павле, сияющие яко две светила велице.

Радуйтесь, Богом спряженная двоице, светоумных Его колесниц.

Радуйтесь, вси святити апостолами боговидцы, яко все вы есте свет всего мира.

Радуйтесь, яко вами от Христа везде возсия спасающая нас вера.

Радуйтесь, святые первопрестольницы Петре и Павле, со всеми апостолами святыми.

Кондак 2

Веровал еси чудно звание свыше прием, учителю языков, егда ти Иисус рече: Савле, что Мя гониши, неверием недостижимаго! Но отселе да веруеши, се бо помрачитися дерзость сопротивная: сведи, да ты избрах судеб Моих пред царями и языки и сынами Израилевыми: таковая же внемши, Богом званный апостоле Павле, возопил еси: Аллилуиа.

Икос 2

Глас с небесе Савле слышав, зрети же по сем не могл еси; сопротивне бо гоняще непостижимаго, и ревности законной приял еси измены слепоту очима; руководим же, купели достиже Божественнаго Крещения, идеже верно погруживыйся, прозрел еси телесными и душевными очима: темже о чудесном звании твоём взываем к тебе:

Радуйся, Богом званный апостоле, посланный на проповедь всем языком.

Радуйся, сосуде избранный, точащий сладость веры Христовы всем человеком.

Радуйся, самовидче озарившаго ты свыше Божественнаго света.

Радуйся, паче иных просвещенный благодатию по сени Ветхаго Завета.

Радуйся, Господу Иисусу, явшу ти ся на земли собеседовавший.

Радуйся, укреплением Его жестоко неверующих обличати дерзавый.

Радуйся, всю вселенную просветивый богомудрыми твоими писаними.

Радуйся, паче всех по Христе потрудивыйся о человечем спасении.

Радуйтесь, с Павлом и Петре, яко два херувимы кивот Церкви Святыя покрывающии.

Радуйтесь, яко два серафими престолу Вышняго предстоящии.

Радуйтесь, вси святити апостоли, яко вы есте небеса поведающии славу Божию.

Радуйтесь, яко вы есте звезды, венчающии Церковь, невесту Христову.

Радуйтесь, святые первопрестольницы Петре и Павле, со всеми апостолами святыми.

Кондак 3

Дивился еси в ужасе Петр святой апостол, видя плащаницу ниспущенну свыше, в ней же бе притча человеколюбя Божия, всеми животными, паче же и нечистыми прознаменующая, яко от всех язык произволяющих веровати в Христа Иисуса, неподобае отметати: толику же тайну уразумев, возопил еси Богу: Аллилуиа.

Икос 3

Естество рода скверна и нечиста, николиже вниде в уста моя, рекл еси всеблаженне апостоле Петре; но Божественный промысл отвеща тебе гласом с небеси: яже Бог

очистил есть, ты не скверни, сим назнаменуя, яко не прииде Спас призвати праведных, но грешных на покаяние. Мы же сия явленное тебе уведевше, вопием: Радуйся, апостоле милостивне, Царствие Небесное, отверзаяй. Радуйся, не на лица, но на дела всех язык взираяй. Радуйся, множество наших покрываяй твоею любовью. Радуйся, и малое покаяние совершаяй своею милостию. Радуйся, скорый помощниче, призывающим тя в бедах душевных. Радуйся, молитвою твоею воздвизаяй душею и телом мертвых. Радуйся, слышащих слово твое верных, Духом Святым укрепивый. Радуйся, словеси твоими, яко стрелами, неверных уязвивый. Радуйтесь, с Петром и Павле, яко два очеса Церкви Боговидная. Радуйтесь, недремлющими веждама хранящими новаго Израиля. Радуйтесь, вси святии апостоли, яко стражие на стенах Иерусалимских. Радуйтесь, наставницы наши бдящие о душах христианских. Радуйтесь, святые первопрестольницы Петре и Павле, со всеми апостолами святыми.

Кондак 4

Живущим в Дамасце людем проповедати начал еси, Богом просвещенный апостоле Павле, да веруют во Христа Иисуса, Сына Божия, иже в удивление ввел еси: како иже верующих в имя Христово прежде гоняше, се и сам претворися в верна! Темже и убити тя совещаша. Уведав же совет их и жестосердие тех в слепоте неверия оставль, от верных кошницею по стене низпущен, возопил еси Богу: Аллилуиа.

Икос 4

Зельною ревностию проповедал еси Павле святой укланятися от служб прешедших Ветхаго Закона и обрезания, притекати же к бане Божественнаго Крещения, не токмо сущим от еврей, но и от язык, иже и любезнейший учитель был еси; сего ради приглашаем тебе сице:

Радуйся, проповедниче Богом посланный к возвещению грешным покаяния.
Радуйся, громогласный учителю благочестия, обличителю злочестия.
Радуйся, от язык к вере Христовой притекающих милостивый приветниче.
Радуйся, заблудших от пути праваго истинный наставниче.
Радуйся, кораблю соблюдающий от греховнаго погружения.
Радуйся, кормчий, управляющий ко пристанищу богоугождения.
Радуйся, скорбящим скоропредстательный утешителю.
Радуйся, немощей душевных и телесных немздоприемный исцелителю.
Радуйтесь, с Павлом и Петре, яко две крыле Церкви от Христа орла великаго.
Радуйтесь, и яко две криле ей голубине данная от Духа Святаго.
Радуйтесь, вси святии апостоли, целы яко голуби, и яко орли упованием окрилатевшии.
Радуйтесь, идеже Христов в теле, таможде и вы собранные.
Радуйтесь, святые первопрестольницы Петре и Павле, со всеми апостолами святыми.

Кондак 5

Земными потяся труды и от лова рыбнаго питаюся, воззван был еси, апостоле святой Петре, и веровав, обильно питающему Христу, иже от пяти хлебов толико тысяць народа насытил есть; последовал еси Ему, труждаяся о брашне негиблющем, но пребывающем в живот вечный, и вопия яко Богу: Аллилуиа.

Икос 5

Имея запрещение от архиерей и старец иудейских, не учти о имени Господа Иисуса, блаженный Петре апостоле, верою несумненною вооружься, отвещал еси, повинутися подобает Богу паче, нежели человеку; за сие же темницу и раны претерпев отшел еси радуяся от лица собора, яко за имя Господне сподобился еси безчестие прияти. Сего ради и мы радостная приносим тебе глаголюще:
Радуйся, сонмище иудейское писании пророческими о Христе посрамивый.
Радуйся, лживая прения фарисеев и саддукеев яко паучину растерзавый.
Радуйся, многи чудеса благодатию Духа Святаго соделоваый.
Радуйся, хромым хождение и слепым прозрение подаваый.
Радуйся, и сению твоею от одров болезни возставивый.
Радуйся, страждущих от дух нечистых многих исцеливый.
Радуйся, ловцев рыб к чудно призываяй ловитве.
Радуйся, яко рыбы безгласны, неверных привлекай к вере.
Радуйтесь, с Петром и Павле, яко два суща невесты Христовы Церкви матери нашей.

Радуйтесь, и яко два грозда винная, питающая нас и веселящая.
Радуйтесь, вси святии апостоли, яко вы есте розги Христа лозы истинныя.
Радуйтесь, яко вы есте и добрые делателие винограда Христова.
Радуйтесь, святые первопрестольницы Петре и Павле, со всеми апостолами святыми.

Кондак 6

Израильтянин от колена Венеаминова, по закону фарисей, по ревности гонитель Церкви Божия, именовался еси апостоле, святой Павле, не покровенно известуя прежняя своя напрасства на верующих в Христа Иисуса; но яко по премногу гонил еси Церковь Божию и разрушал ю, тако ныне славно таяжде тобою украшаема, и медоточными твоими ученьми крепко утверждаема, вопиет к Богу: Аллилуиа.

Икос 6

Кто ны разлучит от любве Божия? Скорбь или теснота или гонение и подобная сим, рекл еси боголюбезный проповедниче вселенныя, апостоле Павле. Всех в Христа верующих, усердно рекл еси к любве Его приводя, яко да доблественне и благодарне Бога ради скорби претерпеваем. Темже любезно приглашаем тебе сице:
Радуйся, ревнителю, бывый в законе Савле званный.
Радуйся, в благодати совершенный любителю Христов, Павле нареченный.
Радуйся, свете богоразумия сущим во тьме неведения.
Радуйся, звездо наставляющая бедствующих в глубине беззакония.
Радуйся, души верных Христу обручивый и в чертог небесный призывавый.
Радуйся, многи скорби претерпевый и прочих терпети утвердивый.
Радуйся, его же руками Бог Силы непросты творяше.
Радуйся, его же и главоотяжкии потные недужныя исцеляше.
Радуйтесь, с Павлом и Петре, яко два столпы Церкви небеснаго Соломона утверждающие.
Радуйтесь, и яко два крины на столпех его святилище Божие украшающие.
Радуйтесь, вси святии апостоли, яко цветы всему миру издающие благоухание.
Радуйтесь, благоуханием вашим отгоняющие всякаго беззакония злоухание.
Радуйтесь, святые первопрестольницы Петре и Павле, со всеми апостолами святыми.

Кондак 7

Людий, живущих в Лиде дошед, удивил еси, блаженный апостоле Петре, егда Енея от осьми лет лежаща на одре расслабленна возставил еси именем Иисуса Христа ходити. Во Иопии же умершую Тавифу на живот молитвою паки возвратил еси. В Кесарию же призван, Корнилия сотника со всеми сущими в дому его, Божественным Крещением просветил еси; и вси абие единомушно взываху: Аллилуиа.

Икос 7

Мысляше Симон волхв благодать Святаго Духа сребром стяжати, его же блаженный апостоле Петре погубили быти наследника и сребром обличи, и сребролюбный нрав святокупства, яко же и святотатства, жестоко запретил еси; темже приглашаем ти сице:
Радуйся, Церковь Христову благодатию духовною обогативый.
Радуйся, мздопрятие за святая в церкви запретивый.
Радуйся, имже сребролюбие яко корень всех злых от благодати духовныя отсецеся.
Радуйся, имже лихоимание, яко идолослужение от святыни отвержеся.
Радуйся, жития нестяжательнаго Христа ради научивый.
Радуйся, заповедь Христову: не можете Богу работати и мамоне, добре исполнивый.
Радуйся, и святотатство Анании смертию казнивый люте.
Радуйся, и Сапфиру в томже согласующую, тойжде предавый казни.
Радуйтесь, с Петром и Павле, яко есте две маслины милость источающие.
Радуйтесь, яко есте два светильники премудростию светящие.
Радуйтесь, вси святии апостоли, яко леторасли масличныя.
Радуйтесь, от них же всяк есть, яко маслина в дому Божиим плодовитая.
Радуйтесь, святые первопрестольницы Петре и Павле, со всеми апостолами святыми.

Кондак 8

Небесе третияго достиг, душевныя и телесныя ради твоя святыни и неизреченными богодарованми обогатився, оттуду шел еси, богоблаженне апостоле Павле, и всех удивил еси, исполняя богоразумными учении, сущих от Иудеи же и от язык в Христа верующих. С ними же купно и мы все верные, тогожде небеснаго учения твоего причастницы, вопием Богу: Аллилуиа.

Икос 8

Образ сущи верным, многия раны жезлием и каменiem биения, на теле твоём радостно терпел еси, сладкаго ради Иисуса, Богом званный апостоле Павле, наказуя явственне, яко в Христа Иисуса верующим, свойственно есть Его ради всякия скорби благодарне терпети: отнюду же и мы пользуемся, вопием ти сицевая:

Радуйся, язвы Господа Иисуса на теле своем радостно носивый.
Радуйся, адаманте крепкий душею и телом, всякия скорби сильно претерпевый.

Радуйся, пред языки и царьми исповедниче Христов непреборимый.

Радуйся, пред законоучителями израильскими учителю непобедимый.

Радуйся, светозарная луче, от третияго небеси просиявшая.

Радуйся, многоплодная лозо от рая пищи духовныя исполненнаго прозябшая.

Радуйся, учением твоим всю поднебесную яко немерцающим светом озаривый.

Радуйся, пользою дел твоих, яко пресладкими плоды по всей земли верных напитавый.

Радуйтесь, с Павлом и Петре, яко два древа посреде рая церковнаго.

Радуйтесь, творящи плод жизни и разумения добраго.

Радуйтесь, вси святии апостолы, яко финики и яко кедры мысленные.

Радуйтесь, яко сад небеснаго Отца на небо пресажденные.

Радуйтесь, святые первопрестольницы Петре и Павле, со всеми апостолы святыми.

Кондак 9

Промышление общее творил еси, блаженне апостоле Петре, о всех приходящих к вере Христовой, имже сердце и душа едина; темже и требованию их пристави служителя целомудреннаго Стефана с шести диаконы. Сам же со апостолы молитве и слову учения прилежал еси, наказуя всех верных, вопиющих единоумно Богу: Аллилуиа.

Икос 9

Ревностию по Господе своем разжегся, Малхови усекл еси ухо, яко неприклонное к слышанию пророческих писаний о Христе Иисусе; и о таковой дерзости возбранен быв Учителем своим, блаженный апостоле Петре, благодарне прещения Его и вся сопротивная приключения претерпел еси. Темже поминающе ревность твою, приглашаем ти сице:

Радуйся, ревностию твоею по Христе учителями прочиих превозшедый.

Радуйся, в вертограде оружниче Христов мужественный.

Радуйся, ведену Иисусу на страсть до дому Каиафы последовавый.

Радуйся, Господа своего ради и в темницу и на смерть готовый.

Радуйся, немощь свою в отвержение исцеливый горьким рыданием.

Радуйся, в первое достоинство призванный по Воскресении Господнем.

Радуйся, и прочим согрешающим в образ покаяния данный.

Радуйся, многожды прости немощи кающихся увещанный.

Радуйтесь, с Петром и Павле, яко две заповедей Господних скрижали.

Радуйтесь, любве к Богу и к ближнему учителю.

Радуйтесь, вси святии апостолы, вся заповеди Господня совершенно сохранившии.

Радуйтесь, вся оставльшии и вслед Христа шедше вся о Нем обретшии.

Радуйтесь, святые первопрестольницы Петре и Павле, со всеми апостолы святыми.

Кондак 10

Свидетельство велие извествовал еси от пророческих речений о Христе, пред начальники иудейскими, пред судиею же Фестом и пред царем Агриппою, Богом званный апостоле Павле, идеже, ово поносне укорен: яко многия тя книги в неистовство прелагают, ово же льстивно отответован, осужден был еси на послание в Рим, еже все благодарно терпя, возопил еси с верными Богу: Аллилуиа.

Икос 10

Троицу Живоначальную проповедати в третьем небеси наставленный, преизбранный сосуде великих таин Божественных, апостоле Павле: благовествуя пред языки, судиями и царьми, обещал еси всем спасение во Христа Иисуса веровати хотящим, и Крещение Святое во имя Троическое приемлющим. Сего ради и мы, все верные, тогожде спасения благонадежны суще, вопием к тебе сице:

Радуйся, многоразбудный откровений Господних таинниче.

Радуйся, в трех лицах Единого Бога исповедниче.

Радуйся, едино основание верующих, Христа быти проповедавый.

Радуйся, всех благочестивых в томже исповедании утвердивый.

Радуйся, от Феста неверного претерпевый неистовля поношения.
Радуйся, пред ним вещавый глаголы истины и целомудрия.
Радуйся, царю Агриппе небесное видение повествовавый яснє.
Радуйся, лєсть его несоизволяющую на веру Христову обличивый явє.
Радуйтєся, с Павлом и Петре, яко две трубы Моисеовы сребряныя.
Радуйтєся, созывающии на брань противу злобы поднебесныя и подземныя.
Радуйтєся, вси святии апостоли, яко добрые Христовы воины злопострадавшии.
Радуйтєся, верою победившии царствия земная и небесная восхитившии.
Радуйтєся, святые первопрестольницы Петре и Павле, со всеми апостолами святыми.

Кондак 11

Убивши Ирод Иакова Зеведеова, приложи яти и тебе, богоблаженный апостоле Петре; его же в темнице крепко стрегома на убиение. Молитве же прилежней бываемой от Церкви: ангел Господень разрешив от уз, изведе сквозе врата о себе отверзшаяся; мнящу ти сон видети, но отступльшу ангелу, быв в себе, познал еси воистинну свободенна тебе быти от Бога и благодарно возопил еси Ему: Аллилуиа.

Икос 11

Филиппом вопрошенное: Господи, покажи нам Отца, увидел еси блаженный апостоле Петре, на горе Фаворстей, на нейже преобразуема Господа преславное изменение лица зря, слышал еси о Нем с небесе глас Бога Отца: Сей есть Сын Мой возлюбленный, о Нем же благоволих, Того послушайте. Мы же толико явления сподобльшемуся тебе вопием:

Радуйся, достоверный сведителю Преображения Христова.
Радуйся, известный слышателю с небесе Божественного гласа Отца.
Радуйся, лице Сына Божия просветившееся, яко солнце, видевый.
Радуйся, осенение Духа Святаго во облаце светле получивый.
Радуйся, ему же на горе святой превысокая тайна открыся.
Радуйся, ему же Троицы Пресвятая велелепная слава явися.
Радуйся, исход Христов слышавый имущь быти во Иерусалиме.
Радуйся, и свой исход скончавый по Христе на кресте в Риме.
Радуйтєся, с Петром и Павле, яко две горы Фавор и Ермон мысленныя.
Радуйтєся, от восток и запад землю обетования на небеси являющии.
Радуйтєся, вси святии апостоли, яко горы Сионския.
Радуйтєся, искапающии нам сладость спасения.
Радуйтєся, святые первопрестольницы Петре и Павле, со всеми апостолами святыми.

Кондак 12

Херувимом равностоятеля, поем тя, всеблаженне апостоле Павле, в третьем небеси Божественною премудростию просвещеннаго: тамо бо слышав неизреченныя глаголы, яже не лєть есть человеку глаголати, с теми вселенную обхождаше, уча веровати в распятаго Христа, Сына Божия, и Ему, яко истинному Богу непрестанно воспевати: Аллилуиа.

Икос 12

Откровением премногим Божественных таин исполнен, избранный сосуде Иисусов, премудрый апостоле Павле, известно пронесл еси имя Бога в плоти явльшагося, и верующих в Него спасающаго; к Немуже многи языки обратив и подвигом добрым подвизався, течение свое преславно за имя Господа своего в граде Римском совершил еси. Прочее же, имущему отложенный венец правды, вопием тебе сице: Радуйся, великий любителю имени Иисусова много за Него пострадавый.
Радуйся, о имени Его небесным, земным и преисподним кланятися засвидетельствовавый.
Радуйся, яко добре свидетельствовал еси о Господе в Иерусалиме.
Радуйся, сице от Тогожде повеленный свидетельствовати в Риме.
Радуйся, Нерона царя обличивый и жену его к вере Христовой обративый.
Радуйся, в томжде Риме с Петром распятым стремглав, главу свою под меч преклонивый.
Радуйся, яко в усечении главы твоя честная млеко истече.
Радуйся, яко сие крайнее удивление многи воя к вере привлече.
Радуйтєся, с Павлом и Петре, яко две реце воды живыя от источника Духа Святаго истекающии.
Радуйтєся, совокуплением двою рек Иор и Дан проявленныя.
Радуйтєся, вси святии апостоли, яко речная устремления, веселящий град Церкви

Божия.

Радуйтесь, яко потоки сладости, напаяющи всех.

Радуйтесь, святые первопрестольницы Петре и Павле, со всеми апостолами святыми.

Кондак 13

О всеславнии и всехвальнии ученицы Господни, Петре и Павле первопрестольнии, и все сопредельнии апостоли святии! Иже всю вселенную верою святою просветисте и с Христом судити весь мир имате: вам по достоинству не на земли, но на небеси совершенная угодна есть слава и хвала; наше же недостойное нынешнее моление приемше, от всяких нас бед достойными вашими молитвами сохраняйте и праведнаго судию Христа умолите милостива нам на Страшном Суде быти: да вашим промыслом спасаеми, воспеваем Спасителю Богу: Аллилуиа, Аллилуиа, Аллилуиа.

Молитва первоверховному Апостолу Петру

О святыи Петре, великий Апостоле, самовидче и сотаинниче Божий, всемогущю десницею Учителя твоего из вод волнующихся приятый и от конечнаго потопления свободивыйся! Не забуди и нас убогих (имена), в тине греховней погрязших и волнами житейскаго моря обуреваемых: подаждь нам твою руку крепкую, помози нам и удержи нас от потопления во страстях, похотех, лжах и клеветах. Сотвори и ты с нами милость, тебе от Господа явленную, да не в сомнении и маловерии изгибнем. Научи нас, учителю наш, проливати слезы покаяния, да плачем горько о деяниях наших в веце сем. И аще твоя слезы, в покаяние излианныя, милостию Своею покры Господь и Учитель твой, испроси и нам, со дерзновением апостольским, прощения во гресех ежечаснаго. Да тихое и безмолвное житие поживем в веце сем до часа, в оныже имать призвати нас веков Господь, наш Судия нелицеприятный. Ты же, о всехвальный Апостоле, не отвержи вопля нашего и стенания к тебе, но заступи нас пред Христом, твоим Учителем, да не престанно славим Его милосердие к нам, со Отцем и Святым Духом, во веки веков. Аминь.

Молитва иная

О святыи великий Апостоле Петре! Не отвержи мя, раба твоего (имя) и стенания моего к тебе. Призри на мя, сущаго в болезнях и печалех, испроси у Христа, Учителя твоего, (содержание прошения), да непрестанно славлю Его милосердие к нам, со Отцем и Святым Духом, во веки веков. Аминь.

Молитва святым первоверховным апостолам Петру и Павлу

О преславнии Апостоли Петре и Павле, души за Христа предавшии и кровию вашею пажить Его удобрившии! Услышите чад ваших молитвы и воздыхания, сердцем сокрушенным ныне приносимыя. Се бо беззаконными омрачихомся и того ради бедами, якоже тучами, обложихомся, елика же добраго жития обнищавом зело и не возможем противитися волком хищным, иже расхищати наследие Божие дерзостно тщатся. О сильнии! Понесите немощи наша, не отлучайтесь духом от нас, да не разлучимся в конец от любве Божия, но крепким заступлением вашим защитите, да помилует Господь всех нас, молитв ваших ради, да истребит же рукописание безмерных грехов наших и да сподобит со всеми святыми блаженнаго Царствия и брака Агнца Своего, Емуже честь и слава, и благодарение и поклонение, во веки веков. Аминь.

Молитва иная

О святии Апостоли Петре и Павле, не отлучайтесь духом от нас, грешных раб Божиих (имена), да не разлучимся в конец от любве Божия, но крепким заступлением вашим защитите, да помилует Господь всех нас молитв ваших ради, да истребит же рукописание безмерных грехов наших, и да сподобит со всеми святыми блаженнаго Царствия и брака Агнца Своего, Емуже честь и слава, и благодарение и поклонение во веки веков.

Молитва иная

О верховнии Апостоли: Петре, веры Христовой твердый изобразителю, и Павле, сладковещательная ластовица учения Господня! Зрим вас, аки многотекущую реку сказаний Христовых словес, истекающую от истинных недр Божиих и всю глубину кладези истин богооткровенных пред нами, жаждущимиими, открывающую. Зрим вас, аки светила, с небесе токи теплоты любве Божественныя нам уясняющая; ублажаем вас, приемших труды и поты, во еже всеяти учений божественных семена; целуем стопы ваша, обтекавшая вся концы земли, и в трепете греховнем зрим главы ваша, смиренно преклоненныя к пречистым стопам Господним: единаго крестным путем

(повешением) и другаго мечным усечением. Умильнопросим вас, святии Апостоли, сотворите и нас в буести греховней преклоненными пред Учителем нашим Господем, сотворите гордости нашей главы усекновение учением богооткровенным; глад душевный наш да утолит Господь брашном, указуемым с самага неба, якоже Петру. Ты же, Павле, богонасыщенный Христовых словес, потщися и нас до третьяго небесе возвести твоими непрестанными о нас ко Господу молитвами, да и мы тамо прославим с лики ангельскими и апостольскими дивнаго во святых Своих Отца всяческих и Егоже послал в мир спасая и наставляя к жизни вечной, Господа Иисуса Христа, и единосущнаго Им Святаго Духа. Аминь.

Молитва иная

Святой верховный Апостоле Петре, камению веры, на Христе, краеугольном Камени, в Церковь исповеданием назданный! Моли, да и аз, умными помышлениями и плотскими похотениями всегда колеблемый, на Тоемже Христе, Камени живом, избранне, честне, верою наздан всегда совершаюся любовью в храм духовен, в священство свято, возносити жертвы духовныя Богови Иисусу Христу. Святой верховный Апостоле Павле, сосуде избранный Христов, благодати и славы Божия преисполненне! Моли имущаго власть над тварию Творца, да мя, ныне сосуд погубленный, сотворит Себе сосуд в честь, освящен и благопотребен, на всякое благое уготован. Аминь.

Тропарь святым апостолам Петру и Павлу

Тропарь, глас 4:

Апостолов первопрестольницы и вселенныя учителие, Владыку всех молите, мир вселенней даровати и душам нашим велию милость.

Кондак, глас 2:

Твердыя и боговещанныя проповедатели, верх апостолов Твоих, Господи, приял еси в наслаждение благих Твоих и покой: болезни бо оных и смерть приял еси паче всякаго всеплодия, Едине сведый сердечная.

Величание

Величаем вас, Апостоли Христовы, весь мир ученьми своими просветившыя и вся концы ко Христу приведшия.

Празднование 29 июня/12 июля